


RIME

Ba-VI -  
- 164 -

IN DIALETTO VENETO

DI

POLIFEMO ACCA



48313

TRIESTE

STAB. TIP. APOLONIO & CAPRIN

1875



RIME

IN DIALETTO VENEZIANO

Proprietà riservata

48813

G. ZHEBASCEK Editore.



PREFAZIONE

AL MIO CARISSIMO AMICO

ANGELO MENEGAZZI

CHE PIÙ D'OGNI ALTRO

M' ECCITÒ A SCRIVERE E A PUBLICARE

QUESTI VERSI



PREFAZIONE

Prima in questo secolo Pont. Esclamazione  
della Scrittura in questo grande libro  
che è intesa ad indicare la propria lingua  
A così questa esclamazione nel penultimo  
L'opione il capitolo d'Oratio

... Voi che amate vestri, abbiate cura  
Di far abbiate al valor vostro eguale

Porta o Goldoni scrivero in un modo  
i loro fatti in lingua non torcano il vero  
l'essenziale ogni altro. Questo dall'essenziale  
di questa grande

E no badando a i fatti del mondo  
Pronto l'anno in cura e loro avanti

A MIO COMPARE ANZOLIN

Ciapandome <sup>1)</sup> un amigo soto 'l braccio,  
El me dise: Gigin, quando stampè?  
Caspita, adesso ch' avè roto el giazzo  
Bisogna pur che fora ve butè;  
De resto l'oselin me ga za dito  
Che vu sè un frate che laora in zito.

E come a scomenzar dal primo zorno  
Che vien su per le scale la comare,  
Parenti e amici ve se taca atorno  
Col desiderio de chiamarve pare,  
E i ve tormenta fina che la siora  
La se decide de spuarlo fora,

\*) Adottando un'ortografia più conforme alla pronuncia, scrissi: ciapar, chiave, ocio ecc. in luogo di: chiapar, chiave, ochio ecc. come accenna il Boerio, Diz. Veneziano.



Stufo de quel'eterna petulanza  
Che me vien a tirar per el capoto,  
Dopo una fastidiosa gravidanza  
Ô messo al mondo un altro piavoloto,  
E apena da le cotole el se mola,  
Ecolo qua che ve lo mando a scola.

Sentirè che *no l' parla venezian*,  
Perchè a San Marco no l' ghe xe mai sta;  
Ma un poco del vernacolo istrian  
In braccio de la nena <sup>1)</sup> l' à imparà;  
E se l' ve par dureto de cervelo,  
Compatilo, compare, el xe putelo.

Ci abbandone 'l un amigo soto 'l braccio  
El me dise: Gigin, quando stampè  
L'aspià, adesso ch'ave toto el giaso  
Biaogna par che forà ve pùe;  
De resto l'ordin me ga va dito  
Che vu sè un frate che laora in sito.  
E come a scomenzar dal primo tonno  
Che vien su per le scale la compare,  
L'arenti e amici ve se fàca storno  
Col desiderio de cinnarve par.  
E i ve tormentà baa che la stora  
La se decide de spuarto for.

1) Nutrice.



CHI XE L'AUTOR?

Quel morò, scarmo, co la barba intiera,  
Dal naso grego e dal color de cera,  
Che sa predir la piova e la tempesta  
Avendo sempre qualche rana in testa,  
Quel giazzà che va sempre in soratuto,  
Che parla a meza vose o fa da mutò;  
Che schiva i ziri d'aria e ga paura  
Ch'una mosca lo spenza in sepoltura;  
Che fila in un caligo sempiterno  
E ga fredo l'istà, caldo l'inverno.  
Conosserlo voleu più da vicin?  
Lezè quatro fazzae del so tacuin.

Apena che me levo la matina  
Me vardo in specio; e se go bona ciera,  
Come un saltamartin vado in cusina  
Per darghe una strucada a la massera  
Che tira via dal fogo la pignata  
E me porze un scuelon de ciocolata.

Me la bevo in un sorso, e alegramente  
Coro a vedèr se in fabrica i laora;  
E no stè creder che no fazza gnente:  
Fumo, spassizo, vago drento e fora;  
Mastego versi, fazzo el pisoloto,  
E me muo vinti volte de capoto.

Poco dopo disnà vado in botega  
Per dar l'ociada a questa nota e quella;  
E gnanca ben scaldada la carega  
Me rampego fin su da mia sorela;  
Ma se i me dise che l'è in compagnia  
De qualche siora vecia, volto via.

Passando per Cavana senza falo,  
Buto un'ociada a i carteloni freschi;  
A le mincionarie de Seravalo,  
Un'altra a le vetrine de Tedeschi;  
E lumando qua e là qualche macieta,  
Casco in un buso a beber la bozzeta.



In un certo local, dove se unisse  
Le cime dei più nobili mistieri:  
Preti e maestri che le mola fisse,  
Proti, spazzacamini, capeleri;  
E per vèderghe ciaro in sto mis-mas,  
Ghe xe 'l factotum d'un' usina a gas.

Pago e traverso el Tergesteo de volo,  
Come un' ombra che passa fra la zente;  
Lezo el listin dei cambi a rompicolo,  
Che dopo za no me ricordo gnente;  
E a cento Ludri dandoghe de naso,  
Entro a man salva nel caffè Tomaso.

Là trovo un club de medici e avvocati  
Ch' a l' ocasion ghe ne sa dir de bele;  
Politici, antiquarj, leterati,  
E tirapiè de Dedalo e d'Apele,  
Che missia come vovi strapazzai  
Le bale <sup>1)</sup> de la Borsa e dei zornai.

Quando me sento mezo snombolà,  
O che me zira l' oca per la testa,  
Co son tuto in un' aqua o rafredà,  
E me disturba quela porta o questa,  
Me tiro quacio quacio in un canton  
Che ve paro una mumia de Venzon.

1) Bubbolo.

Per no saver dove passar la sera,  
Me buto al Comunal o a l'Armonia;  
Se al caso i nē regala una cagnera,<sup>1)</sup>  
Fazzo el mio chilo sin che l'è fenìa;  
Po drito a casa come i boni puti,  
E vado a piè per sparagnarli tuti.

Co la felpa incastrada su la copa,  
E col capotò ben imbotonà,  
Co i brazzi che fa un cinque su la gropa,  
Bato la strada a passo de soldà;  
Ma in certi siti, dove xe più scuro,  
Me tegno in mezo e tiro l'ocio al muro.

Quando che arivo a l'ultima stazion  
Me drezzo su la schena e ciapo fià;  
Vardo se go la chiave del porton,  
Se 'l lumin su le scale xe impizzà:  
Nel caso che no andasse tuto ben,  
Fazzo l'inferno sina che no i vien.

Vado su più lizier d'una farfala;  
Me cavo i guanti, el paletò, el capelo;  
Trovo in cusina la polenta zala,  
Un piato de fasioi trovo in tinelo:  
Magno, bevo, me fumo un spagnoletto;  
E come un santo me calumo in leto.

1) Corbelleria.

Avendome una siora domandà  
Se in vita mia me xe mai nato gnente,  
Perchè de note, fora de cità,  
Xe facile che toca un accidente,  
Dirò che fin adesso, grazie a Dio,  
Son arivà in porton sempre col mio.

Sapiè del resto che no son de quei  
Che porta i bezzi atorno a spassizar;  
E se i me trova adosso quatro schei,  
Xe tuto quello che i me pol robar;  
E co se nasa che la xe cussi,  
No merita sporcarse, digo mi.

A i tempi che portava un bel relogio,  
(Ch'ò magnà senza gusto in una cena,  
Ne la qual per cavarmela d'imbrogio  
L'ò dà preson co tuta la caena,  
Aciò che no i me guanta per la gola  
Zirava sempre armà d'una pistola.

Ma dopo che un moderno Becaria  
Co tanto de parole m'à spiegà  
Che prima de servirse de culia  
Bisogna vardar ben quel che se fa,  
E no inarcarla e manco tor la mira  
Fina ch'el ladro no ve dise: tira!

Mi, da persona previdente e soda  
Che no vol pesarioi<sup>1)</sup> su la cossienza,  
Porto l'arma, sior sì, ma sempre vòda:  
S'anca i me copa, sia con Dio, pazienza;  
I posterì dirà: „L'era un bon fio,  
Che 'l codice a la panza à preferio!”

1) Incubi.

LA MIA CONTRADA. (1873)

Che no i me parla de la via Toledo,<sup>1)</sup>  
Dei bacani de Londra o de Parigi;  
Per carità, che no i me vegna fora  
Con Babilonia, Sodoma e Gomora,  
Co i urli de le done e dei putei  
Quando el Vesuvio à sosegà Pompei:  
Chi vol vedèr l'inferno in miniatura  
E fra quel tananai<sup>2)</sup> perder la recia,  
Che vegna, cazza, a la Bariera Vecia.

Se l' matutin chichirichì del galo  
À desmissià l' apostolo San Piero,  
Qua tenori e baritoni sfogai  
Co mastele de rave e petorai;  
Conzaori de lastre e de fersore,  
Negozianti de sorbole e de more,

1) A Napoli. — 2) Strepiti.

Luganeghe, persuto e castradina,  
Da la roba più scarta a la più fina:  
Fritole, peverini e mandolato,  
Da i boconi de lusso a quei del gato.

Se no ve basta el son de la manera  
Cb'ogni momento fa stremir la tera,  
Sentirè le sbragiae de qualche mulo  
Che mostra i quarti d'ombolo e straculo;  
Un tibidoi <sup>1)</sup> de babe che va in ziro  
Tastando fruti, pan, lardo e butiro,  
De massere che strila, che tempesta,  
E se sgrafa e se petena la cresta.

Framezo a i picapiere in gran funzion  
Per far la strada a schena de molton,  
Scoazzeri che mena el sbrufaor  
Lavandoghe le braghe a qualche sior,  
Qua vedarè passar la filastroca  
Dei militi che porta la pagnoca;  
I civici pompieri in piena festa  
Col speo sul fianco e la pignata in testa.

Zo d'ogni banda capita una fola  
De menuagia che vien via de scola;  
De machinisti, fravi, marangoni,  
Fachini, laoranti e de garzoni;

1) Rumore confuso.

Tintori, pegoloti, calafai,  
Boteri, farinoti e manoai;  
Modiste, sartorele e sessolote <sup>1)</sup>

Che porta i fiocchi su le scarpe rote.

Varè che confusion, che bissabova!

Tute le case par che le se mova  
Drio sta furia de cari e de cavai,  
De manzi e muli, d'aseni e castrai,  
Che se sbanda, che bulega, che salta,  
Se dà drento da orbi e se rebalta.  
Svola i cazzoti; <sup>2)</sup> canadindie, ombrele,  
In fregole va su fina le stele.

I se ciapa, i se rondola per tera

Come la tigre e come la pantera.

Va sotosora tuta la contrada

Insina che non vien la peverada, <sup>3)</sup>

Che a son de bote e co la renga fora

Li strassina tra i fischi in gatamora,

Intanto che se vede portar via:

Caco <sup>4)</sup> a San Giusto, <sup>5)</sup> Alcide in specieria.

1) Quelle che servono nei magazzini. — 2) Fugni. — 3) Pattuglia.

4) Il centauro Caco venne ucciso da Ercole od Alcide.

5) Alla cappella dei morti.

IN MORTE D'UN GATO

El mio povero Miceto,  
Se savessi.... l'è crepà!  
El par proprio un anzoletto  
Su la bara indormenzà.

Quando penso, benedeto,  
Che 'l veniva la matina  
Cufolarse a piè del leto,  
A filar <sup>1)</sup> la romanzina;

Co pulito el destirava  
Le zatine su la tola,  
Con che grazia el me robava  
El bisato o la brisiola,

Se me strazza el cor nel peto,  
No me rege più i zenoci:  
Deme, deme un fazzoletto,  
Go le lagrime nei oci.

Ma xe inutili sti pianti:  
Dio l'à messo za frà i santi;  
L'à volesto, e cussi sia...  
— Scoazzer, portèlo via.

1) Il ronfare del gatto.



EL SOCO <sup>1)</sup> MODERNO.

---

Come Neron, fumando el spagnoletto,  
Bampar <sup>2)</sup> vedeva Roma tuta quanta,  
Che no à valso i pompieri col schizzeto  
Nè i preti col bugiol de l'aqua santa,  
E in quel che tuto andava a tombolon  
El solo Culiseo restava in ton,

Vede la musa comica latina  
Sta Babilonia de comedie a braccio,  
Che va perdendo 'l stuco e la calcina  
E finirà deboto in rovinazzo: <sup>3)</sup>  
Ghe passerà su el Tempo co la scova,  
Ma eterna reterà la „Casa Nova.“

Si allude allo studio del vero, - usato da Carlo Goldoni  
e negletto dal più dei moderni.

1) Socco, calzare degli strioni antichi nella comedia.

2) Ardere.

3) Mucchio di macerie.

*Luigi Lamboni - Impresario alle Ligustiche.*  
ANGELICA E MEDORO

FANTASIA

Quei sposini tacai come cerese,  
Delizia e maravegia del paese,  
M' à stuzzegà gersera l'estro mato  
De sbozzarve in do segni el so ritrato:  
In mezo a un gran consegio  
De mutrie<sup>1)</sup> e ciaciaroni sfogonai  
Che parla in diese per capirse meglio,  
Vestia de zalo vedarè una vecia  
Con vose gnaga<sup>2)</sup> da sbusar la recia,  
Un par d' ocieti grisi e petolai,  
Un muso tuto grespe e caramai;  
E cussi garba, in tanta so malora,  
Che 'l pesse can la spuarave fora.  
El cavalier par un osel de note,  
Anzi un automa co le suste rote,  
Tuto quanto ingobà, storto, ingranfio;  
Per saludar el slonga el colo un mio,

1) Facce brutte e deformi.

2) Soverschiamente acuta e sottile.

E tirando su e zo la capelina  
Quindese volte el scassa la testina,  
Restando un'ora co la felpa in man  
Come l'orbo ch'aspeta el carantan.  
Co le zampe davanti a picolon,  
Tegnindose l'ombrela soto 'l braccio,  
El va zirando intorno a zopegon  
Come chi tenta caminar sul'giazzo,  
E scovrendo la zentil sirena  
Par che 'l se storza el filo de la schena.  
Tirando una carega al taolin,  
A onza a onza el ghe se fa vicin;  
El ghe parla, el ghe ride, el la carezza,  
El va in brodo de viole, el se imborezza,  
E quando la fa segno  
D'andarsene, el xe là pronto a servirla,  
A tegnirghe la borsa, a rivestirla,  
A meterghe la siarpa sul scufioto,  
A drezzarghe le pieghe sul daoto.  
E come, terminada la funzion,  
El vescovo scortà dal capelan  
Fra mille repetoni<sup>1)</sup> se la moca,  
El nostro cavalier  
Sporzendo 'l braccio a la so dolce arpia  
In tuta gloria el se la portà via.

1) Biverenze.

Se la Camera Ecelsa Comercial<sup>1)</sup>  
Che impeniva la Mostra Universal  
De pegola, de solfare e carbon,  
De broche, ciodi, canevo e saon,  
Co risparmi d'incomodi e disgusti  
La gavesse mandà sti do bei fusti;  
La s'avarave certo merità  
El diploma d'onor,  
E la riconossenza  
D'ogni melon che nasse in sta cità!

1) All'Esposizione Mondiale di Vienna, l'anno 1873.

EL MISANTROPO

---

Su l' orlo d' un fosson da cimitero,  
Fra i omeri e le tibie sparpagnae,  
Co la gran felpa e 'l tabaron per tera,  
Vedo quel fosco principin danese  
Che se magna una crepa co le ociae,  
Scovrir volendo qualche gran mistero:  
Ma, struca struca, no 'l conclude un zero.  
Sta classica figura tanto bela  
Me fa pensar a ti, caro Filippo,  
A quei tempi beati  
Che ti geri un moscon, un mataran,  
Sempre col Berni e co l' Ariosto in man;  
A quei di che se andava in società  
Col gilè bianco e 'l zazzarin scotà,  
Se faceva la polca e la monfrina  
Zapandoghe sul piè a la balarina,  
E se passava alegramente l' ore  
A dir sempiezzi e a mincionar le siore.

Ma dal zorno fatal che ti à fissà  
De scrutignar quei veci zanfruloni  
Che andava predicando el so vangelo  
A le colone de l' antichità,  
Te vedo co la fazza stralunada,<sup>1)</sup>  
Con un braccio de barba sgrendenada,  
E curvo, curvo, co la man sul peto,  
Andar baucando<sup>2)</sup> per le vie del ghetto.

T'ò visto qualche volta al mio caffè,  
Sempre solo, nicià nel to canton,  
Che no te smove un colpo de canon;  
Opur, nel to pastran imbovolà,  
Tuto quanto ingrugno, tuto ingrintà,<sup>2)</sup>  
Più duro, più salvadego d'un orso,  
Novo Timon zirandolar<sup>3)</sup> sul Corso.  
Te vedo spesso incocalio sul molo  
Star ore e ore a far la corte al polo,  
Specular su la piova e la tempesta  
Col fronte scuro e senza cana in testa;  
Se un amigo te vol avvicinar,  
Ti lo vardi per tresso e storzi el muso,  
Come volendo dir:

„Fate via, disgrazià, se no te sbuso!“

Ma se ne l'indoman te core 'l vovo<sup>4)</sup>  
De sentir quello che ghe xe de novo,

1) Incollerita. — 2) Senza saper dove nè perchè.

3) Gironzare. Timone d'Atene, il misantropo.

4) Ti viene il capriccio.

E ti te moli e sbampoli qua e là,  
Picante Orazio col capel sbandà,  
Co una filza d'anedoti salai  
Da far schiatar chi no à ridesto mai;  
E se, calzando un'aria da profeta,  
De la to pinza<sup>1)</sup> ti ne dà una feta,  
Lassete dir che la xe sempre poca  
Per la stagion che no ti verzi boca.  
Vustu guarir, fio mio, de sta passion?  
Manda a Patrasso Eraclito e Zenon,  
Co tuti quei filosofi e sienziati  
Che a i zorni nostri passaria per mati;  
Seguita invece nei so alegri voli  
Porta, Zorutt, Goldoni, Guadagnoli,  
E lassa pur che 'l vaga a tombolon.  
Sto mondazzo de carta da balon.

1) Focaccia.

EL CURIOSO

---

Smanioso de saver le novità,  
Tuto quanto infogaò, tuto suà,  
Lo vedè batolar col portiner,  
Col biavarol, <sup>1)</sup> col fante, col barbier;  
E corer de galopo in farmacia,  
In piazza, in Borsa, al molo e in pescaria:  
Dal gran caffè dei *Dindi* al tribunal,  
Dal magistrato al *magazen del sal*.  
Se nasse un furto, un ciapa ciapa, un fogo,  
Fra tuta la marmagia el se fa logo.  
No se liga un rebel nè un farabuto,  
No se mena un pitoco a l'istituto,  
No se rebalta una mastela o un vaso,  
No s'averze un canal senza el so naso;  
E tuti quei fasioi che l'à ingrumà  
El li va a semeinar per la cità.

---

1) Granajolo.



## EL CIACIARON

Suto, suto, col naso impeverà,  
Co le do zampe in crose e col barbuzzo  
Sul pomo de la crozzola pontà,  
Ve presento quel strazza d'omenon  
Che se magna in salata Ciceron;  
Che, tabacando, spua sentenze d'oro:  
Quelo che taglia la borela al toro.

Voleu saver per cossa  
La cometa de Biela ga la coa?  
Fra presa e presa el ve dirà la soa.  
La grandezza el conosse d'ogni stela  
Megio che i busi de la so scarsela.  
El sa tratar politica e finanza  
Più del pelao ch'è petenà la Franza,  
E divider l'Europa malcontenta,  
Come quel fil che taglia la polenta.  
Sorzo de biblioteca e gran censor,  
El ve giudica i libri da l'odor,  
E par che l'abia col divin poeta  
Quatro cibibi sgnocolà in bareta.<sup>1)</sup>

1) Frase ch'esprime troppa confidenza presa con persona di grado superiore.

Comentando i zornai riga per riga,  
Più de la vespa el ponze e de l'ortiga;  
E trovandoghe drento un macaron,  
El ve lo porta fora col piron.  
El ve sa tamisar Cristo e Mosè,  
Pesar ne l'aqua la corona a i re.<sup>1)</sup>  
Ma cossa ancora a criticar ghe resta?  
El perucon de stopa che 'l ga in testa?

Co parla sto bocon de dottorazzo  
Tireve su la boca el caenazzo,  
E prima che no l'abia terminà  
Guai a chi olsa de tirar el fià!  
Ma co 'l s'acorze che nissun lo bada,  
Co le pive nel sacco el volta strada;  
E brontolando e destorzeno 'l colo,  
Per no perderla marza el parla solo.

1) Archimede pesò nell'acqua la corona del re di Siracusa, per dedurre dalla sua gravità specifica la quantità d'oro e d'amalgama che poteva contenere.

LE SQUINZIE<sup>1)</sup>

---

Tolè, pitor, la taolozza in man:  
Tireme zo co quatro penelae  
Sta manega de squinzie spetoraè  
Che sbazzega in teatro e fa bacan.

Nel so palcheto vedarè una siora  
Dal naso a beco e dal barbuzzo in fora;  
Tuta smorfie e morbin, tuta scoperta,  
Piu de la Pompadour e la Ninon  
De l'alta scola nei secreti esperta.

Missiandose qua e là tuta la sera  
Piena de grili come una puliera,<sup>2)</sup>  
No la se volta mai verso la scena  
Che per mostrarghe al publico la schena.  
Col tiro più academico e più scaltro  
La ve sparisse da un momento a l'altro,  
E la ve torna fora a poco a poco  
Come la luna in tempo de siroco.

1) Donne affettatamente attillate.  
2) Poledra.

Ogni tanto la becola un confeto,  
Ciacolando la papola el sorbeto;  
Co la ganassa sgionfa, a do palmenti  
I caramei la masena co i denti,  
O la se mete in una posa tal  
Da zurar che la magna el canocial.  
La sa far i sberlefi co la boca,  
Slongar el colo da parer un'oca;  
Restarve là, incantada più d'un'ora  
Col naso in aria e co la lengua fora;  
Ma se i ghe mola un colpo al tamburon,  
Povera tata, la se dà un scasson.

E vu altre petazze buscarone  
Che studiè tanto sul color del fioco,  
Per far beato un povero marzoco;  
Vu altre squinzie co l'anelo in deo,  
Che zirè tuto 'l zorno avanti e indrio  
Portando in un scartozzo  
El vadagno d'un mese del mario,  
Specieve in ste galine faraone!

L'A MARANTEGA<sup>1)</sup>

— Mo chi xela sta grima in capelon  
Che va da i frati a far la penitenza,  
Che par saltada fora dal casson  
Dei strafanizzi per la Previdenza?  
Co la ve mostra quel bruto mustazzo  
La par l'ira de Dio depenta a sguazzo.

— Come? No cognosseu dona Catina,  
Quela che sgoba come una massera,  
Che scoa, che frega, e po la va in cucina  
A conzar<sup>2)</sup> la pignata e la caldiera,  
E che biastema pezo dei danai  
Se no i ghe lava in ordine i bocai?

No son paron d'andar a la fenestra  
Senza vedèr la bagolar su e zoso  
Tanagiando<sup>3)</sup> e facendo la maestra,  
Tirandoghe le recie a qualche toso;  
Senza sentir sto fulmine de dona  
Che sbragia, che strapazza o che bastona.

1) Vecchia deforme, aggrinzata e secca.  
2) Cendire. — 3) Tormentare.

La scufia in testa e la traversa al fianco,  
Piena de ciave come un carcerier,  
La va in cantina, la ve sta drio 'l banco,  
La furega ne l'orto e nel graner;  
E per tenderghe meglio al so interesse  
La mete su i mustaci e le braghesse.

Se da un vecio schenal de pano zalo  
La ve fa saltar fora un veladon,  
E i dindi che la ciapa de regalo  
La li mete in comercio de scondon,  
Capirè che a poderla praticar  
Ghe sarave del belo da imparar.

L'impresta soldi al sedese per cento  
Tolendo in pegno anei de matrimonio,  
Possae, recini e tatate d'argento,  
Reliquie de San Marco e Sant'Antonio;  
E fulgnando <sup>1)</sup> meglio che la pol,  
La dà ponti a l'avarò e al strazzarol.

Ma co se zuna <sup>2)</sup> e co se bate 'l peto,  
E se ciapa ogni dì la santa messa,  
Co se ghe manda al papa l'oboletto  
E i strucoli de pomi a la badessa,  
Basta pagarghe al portiner el goto,  
Che s'entra in paradiso a scopeloto.

1) Frodando. — 2) Digiuia.

EL ZERBINOTO

---

Core su e zoso un figurin stampela  
Col museto de rana,  
La riga in mezo e le bandete in suso;  
In golarina rossa,  
Le braghete pistacio e un capotin  
Che no passa el fianchetto balarin.  
Rizzandose i barbisi o la moscheta  
E sberlefando come una simieta  
El va farghe d'ocieto a quela e questa  
Più in gringola d'un can vestio da festa.

Ma no se dà spetacolo più belo  
Che a vederlo montar la cavalina,  
Co 'l va sul Corso a spassizar bel belo,  
O a far a Sant' Andrea la trotadina,  
E tegnindose al pomo de la sela  
La figura el ve fa de Purcinela.

Ma in un momento la Zerlina astuta  
Scarta, sbarra, s'impenna e via de volo;  
El cavalier che se la vede bruta  
Spasemà se ghe ciapa a brazzacolo,  
Insin che tuta alegra la cavala  
*A son de tromba* se lo porta in stala.



A UN COMITATO ELETORAL.

Basta che se presenta un forestier  
Con peto sgionfo e quatro dei de cresta,  
Che 'l destira lasagne a so piacer  
Secondo la farina che l' à in testa,  
Siorsi che i me lo cata col feral  
Per farlo consegier municipal.

E mi, corpo de bio, che son qua nato,  
Che per ogni canton go pozzi d'oro,  
Che pago le mie tasse al Magistrato,  
Mi, che a nissun no go da darghe un boro,  
Che me fazzo tirar da sie cavai,  
No me se mete ne la lista mai?

Mo credeu che no sapia ciaciarar,  
O che no gabia forza de polmon?  
Deme una tromba e ve farò scampar:  
Lassè che parla e vedarè chi son.  
Feve avanti, bufoni, e sa sicuro  
De sequestarve un dopo l'altro al muro.



De cossa po se trata, in conclusion?  
De tamisar l'arenda comunel?  
Far, desfar un casoto, un fontanon,  
O trapiantar qua e là qualche feral?  
D'assegnar la pension a l'impiegato  
Che magna come un lovo e spua nel piato?

Capirè ben che per sta gran facenda  
No ve ocore una cima d'omenon;  
Ma un tal che circum circa se n'intenda  
De scaldar o sfredir el caregon:  
De quei che dorme o che se leva in piè  
Mi ve ne trovo quanti ne volè.

A le curte: savè dove che stago,  
E che a vignir fin là no xe lontan;  
Se mai ghe fusse qualche spesa, pago;  
Pago e ve zonzerò la bonaman:  
No steve indubitar... me butò fora...  
(Gnoco<sup>1)</sup> se nò me refo in magnaora).

1) Baccellone.

Ze vero che se crepa un bravo omoto,  
O un loco de justissimo sbanda,  
Semo più pronti a farghe l' so bastano,  
A impalcarlo come un papaga;  
Ma po Dio sa che razza de diavoli  
Nessi in conscria xe passai per stelli.

Prefetisso pintofo la maniera  
Ch'è imaginà quel tomo de Segato.

### LA CREMAZION

De conver-  
Per farghe un monumento al Magistrato.

O sia un colombari colozzi  
Per l'infelice Consiglio Comunale.

Co un pover'omo à fato la valise,  
Nissun se move per andarghe drio;  
Se tira fora un par de calze sbrise,  
El capoto più vecio e descusio:  
Una bona rasada a la massela,  
E se 'l ga barba, sparagnè anca quella.

Esponendolo come un pèsse can  
Tra le smorfie e i bordei d'ogni genia,  
Aspetemo che vegna el capelan  
Co i so martufi a sbarazzarlo via;  
Tre giozze d'aqua santa, una preghiera,  
E a rivèderse, o caro, soto tera.

Xe vero che se crepa un bravo ometo,  
O un toco de lustrissimo sfondà,  
Semo qua pronti a farghe 'l so bagneto,  
A imbalsemarlo come un papagà;  
Ma po Dio sa che razza de birbanti  
Messi in conserva xe passai per santi!

Preferisso piutosto la maniera  
Ch' à imaginà quel tomo de Segato,  
De convertir la carne in tanta piera  
Per farghe un monumento al Magistrato,  
O sia 'na colombera colossal  
Per l' inclito Consegio Comunal.

Ma la perla de tutte le invenzion  
Xe quella che ve mete in un bel forno  
A brustolarvé megio d' un capon,  
Senza che in fogo vada perso un corno;  
E co la magra spesa d' un fiorin  
Carlo Magno diventa spolverin.

Col fumo che se leva da i rognoni  
E da tuto quel lardo descòlà,  
Andaremo per aria co i baloni,  
Tuta ilumineremo la cità.  
Fazza i pianeti siopero co i vol:  
Venda el so caro e i so pulieri<sup>1)</sup> el sòl!

1) Poledri.

Saludaremo in ogni lampadario  
Parenti e amici che xe andai con Dio;  
In ogni cana sbusa un impresario,  
In ogni beco l'ombra d'un mario:  
E ne la sacra usina de Sant'Ana <sup>2)</sup>  
El Panteòn de la carogna umana!

2) Il cimitero.

EL SOSPIRO DE TOMASO CANELA

---

ANTIFONA

Quando l' Amor vol meterghe la zata,  
Can e gato el fa unir soto l' ombrela;  
El fa ch' Orlando perda la zavata,  
Che diventa Rinaldo una sardela,  
E che l' omo più stagno de cervelo  
Sporca le braghe pezo d' un putelo.

Una volta anca mi gera de quei  
Ch' apena i vede un cotolin che svola,  
I core come tanti barbastei<sup>1)</sup>  
Ne la speranza de saziar la gola;  
E co vedeva certi bei museti  
La me zirava più de la Fioreti.

1) Pipistrelli.

Adesso invece, Cristo benedeto,  
No le me passa gnanca per la mente;  
Se qualchedun me mostra un bel tochetto,  
Lo vardo, e schiao, più no me fazzo arente;  
Ringraziando la Vergine Maria  
Se un pampalugo <sup>1)</sup> me lo porta via.

Ma pur, gh'è sta un momento, e lo ricordo  
Col cuor tuto ingropà sto brutto caso,  
Che sul più bel che me credeva sordo,  
Via da la recia m'è scampà el bombaso;  
E andando in paradiso col balon,  
Ò desvodà sto sacco de sabion:

### LA COCOLA

Moreta mia, xe un pezzo che te vardo  
E che l'amor me bisega nel sen;  
Ma essendo vecio lugaro bastardo,  
No posso dirte che ti xe 'l mio ben:  
No voglio che i me creda ribambio  
Nè che i me taca i mocoli da drio.

1) Sciocco.

Co te vedo a teatro, sul balcon,  
O se per caso ti me passi arente,  
Me sento andar a viole la rason  
E del giudizio me scantina el dente;  
E co puzo la testa sul cussin  
Me bate nel cervelo un svegiarin.

Da qualche tempo ti me rizzi el naso,  
Voltando i oci per parer più bela;  
Ma un omenon par mio sa in ogni caso  
Compatir le fumae d'una putela:  
Una mugier senza nissun difeto  
No la farave nio<sup>1)</sup> soto 'l mio teto.

Ah se podesse lusingarme, o cara,  
De procurarte una scosseta al cor,  
Sonando verso l'alba la chitara  
A rischio de becarme un rafredor,  
Vorave far la parte de Lindoro  
Ch'intona la romanza al so tesoro.

Ma dovendo, pur troppo, renunziar,  
Come t'ò dito in una mia sestina,  
A l'idea de poderme snanarar<sup>2)</sup>  
Vicin la to graziosa testolina,  
Prima che sona l'ora del matio  
Ciò un baseto nel fronte e va con Dio.

1) Nido.

2) Andar perduto per tenerezza e per trasporto. Tolto dall'imitazione delle anitre che disgajazzano festosamente nell'acqua.



PREFAZIONE

SONETTI



## PREFAZIONE

---


Quel patriarca dal barbon d'ariento,  
Muso da galantomo e cuor contento,  
Che sporze a i veci amici el so tabaco  
E per farve un piacer no l'è mai straco,  
El voria che piovesse i mii soneti  
Come de carneval svola i confeti.  
Caro el mio zentilomo venezian,  
Mi no son nato co la pena in man,  
Ma tanto e tanto, a parar via la smara,  
Darò una sdrondenada a la chitara:  
Se no 'l sarà formaggio piacentin,  
Ciamèlo pur morioto <sup>1)</sup> o pegorin.

1) È il formaggio della povera gente.

PREFAZIONE

Questi paragrafi dal paragrafo d'arresto  
Meco da piantando a ciao soltanto  
Che epore a i veal amici et so tabaco  
E per farve pu girar no l'e mai russo  
Et vora che piovera i miu rossi  
Come de caneva! avola i canea!  
Caro et mio xalunco venesia  
Mi no son nido de la pira in man  
Ma tanto e tanto a parer via la amara  
Dad una arondanda a la chitarra  
Se po l'ave fornagis piacerin  
Garnelo per monico" o peccin

LA MIA MOROSA



Me son proposto cento volte e cento  
De far da omò e no voler cantar:  
Ò zurà de mai più scarabociar,  
De butar libri e scartafazzi al vento.

Ma cossa giova el mio proponimento  
Se la Musa me vien a stuzzegar?  
Disè vu altri: cossa oi mo' da far?  
La mando fora e la me torna drento.

In sete mesi la m'ha fato ün fio:<sup>1)</sup>  
De tanta vena e tanto morbinosa,  
Che dubito mi stesso che 'l sia mio.

Per questo el capelan vol che la sposa,  
Ma ghe rispondo: „Caro pre' Matio,  
No basta che la sia la mia morosa?“

1) „Le Maravegie e Delizie d'un caffè,“ che non figurano nella presente raccolta.

ALL'ANTITESI

---

Gilgio! Mo che bel nome! Un nome tal  
Sarave degno d'un zentil poeta  
Nato sul Pindo in scufia e camiseta  
Per cantarne la vita pastoral.  
Ma invece la mia stela malandreta  
Mà regalà più pevare che sal:  
L'ingiostro che vedè in sto caramal  
No risponde per gnente a l'eticheta.  
Mi no so ben che razza de demonio,  
Che va zirando el mondo col fiascon,  
L'abia da burla travasà in sto vaso;  
So che no son el fior de Sant'Antonio  
Che spande per la casa odor de bon,  
Ma un'erba spina che ve ponze 'l naso.

APOLO IN CAMPAGNA

---

D'ogni tristo pensier spazzo el caligo  
A quatro passi da la mia bicoca,  
Dove un bel scagno, che nissun me toca,  
S'alza ne l'ombra d'un boschetto antigo.

Vedo la giozza pindolar dal figo,  
Nel stagno sguatarar l'anara e l'oca:  
I polesini che va drio la cioca,  
El passero che vola e 'l becafigo.

Cossa m'importa se no ciapo un boro,  
Se le braghe me casca zo dal fianco,  
Quando in sto buso go trovà un tesoro?

Qua, tra le fogie e 'l vento che sospira,  
Sora una vida de moscato bianco,  
Spetando Ottobre, impicarò la lira.

L'INCOGNITA

---

La diga, siora bionda benedeta,  
Coss'elo sto rigor da puritana?  
La tira su, da brava, la veleta,  
Che vedemo un tantin la so musana.  
La varda quanti zoveni ch'aspeta  
E che se missia e bate la terzana:  
Vorla che i resta co la boca neta?  
No la sarave carità cristiana.  
Questi xe tuti fioi da maridar;  
Zente pulita, zente onesta, zente  
Che spasema d'amor per vussoria.  
Se la comanda, posso combinar:  
De sensaria no ghe domando gnente...  
Ca de Diana, che folpo! — Andemo via.



LA VERSOMANIA

---

Lezè i scritori classici latini  
A scomenzar dal secolo più basso;  
Lezè Dante, Petrarca, Ariosto e Tasso,  
Alfieri e Monti, Foscolo e Parini:  
E veneti e lombardi e fiorentini,  
E tuti quei ch'al mondo à fato ciasso;  
Comentelli un per un, passo per passo,  
E caveghene fora i latesini.<sup>1)</sup>  
Sgobè come una bestia da strapazzo,  
Tuto per starghe drio desmenteghè:  
Ligheve a taolin co la caena;  
Se no sè nati co un tantin de vena,  
Ve garantisso mi che no farè  
Che un mar de versi co tre dei de giazzo.

1) Animelle.

PER CELEBRE ARTISTA

(CAMILLO SIVORI)

---

Quel picenin che monta sul scagneto  
Per sonar la Sonambula e 'l Mosè,  
No xelo un mago, un spirito foletò,  
No xelo forse dei violini el re?

Lu ve porta a le stele col so archeto,  
Sora una corda sola el fa per tre;  
Ma co 'l spiega el so genio in un quarteto,  
Squasi squasi a i miracoli credè.

Per lu sospende 'l canto i canarini,  
E i gran maestri che l'ascolta in cielo,  
Vardandose un co l'altro i slonga el naso.

Ombra imortal del vecio Paganini,  
Ciàpelo fra i to brazzi sto putelo,  
Meteghe su l'aloro e daghe un baso!

A UN ESIMIO CAPOCOMICO

---

Gavaressi el morbin de torne via,  
Caro 'l mio capocomico dreton,  
Col meter sora el vostro cartelon  
Sina i famegi<sup>1)</sup> de la compagnia?

No bastava una longa litania  
Che va dal primo a l'ultimo bufon?  
Chi smorza i lumi o cala zo el tendon,  
Poco importa saver che zente sia.

Ma quel ch'in tera no s'ã visto mai,  
Quelo che ne spaventa più de tuto,  
Xe i tre sugeridori ben fiadai.

Sentime, in confidenza, caro puto:  
Voleu che i fati vostri sia lodai?  
Tegnighene uno solo — e che 'l sia muto.

1) Servi.

EL CIASSON

---

Andè a teatro? Gavè visto mai  
Quel bulo<sup>1)</sup> destirà sul caregon  
Che sa menar le gambe a dindolon  
Sbianchizando i so amici co i stivai?

Che ve tien viva la conversazion  
Fra un ciapo de mandrili imborezzai?  
Che frua, sbatendo, i guanti sprofumai,  
O subia co la chiave de scondon?

Col bastoncìn tastandoghe la schena  
El ciama tuti quei che ghe xe atorno;  
El spròtona,<sup>2)</sup> el contrasta, el li remena.

El ciassa, el pesta, el ragia<sup>3)</sup> in mille forme;  
Mandarlo al galateo no zova un corno,  
E no senti a cantar che quando el dorme.

1) Bravaccio. — 2) Fa il saccente. — 3) Raglia.

EL TEATRO GIAZZERA

---

Chi vol tacar la cassa dei polmoni,  
Ciapar la ponta e star a leto un mese,  
Vegna qua drento senza el plett inglese,  
Senza intrighi de siarpe e pelizzoni.

Quando supia la bora in sto paese,  
Co l'orchestra s'acorda i finestroni;  
Ciniseli e Guillaume co i so staloni  
Pol passar drento e fora per le sfese.<sup>1)</sup>

Quando in platea se bagola o camina,  
Canta le tole soto alegramente;  
In galaria se bala la monfrina.

Tolve un palco, e se nel buso arente  
Se move qualchedun, tuto scantina:  
Se rompe una tiraca?<sup>2)</sup> — se la sente.

1) Fessure.

2) Striscia di cuajo o d'altro con cui si sostengono i calzoni.

## LA MIMA SELERATA

L'avvenente mima che formava la delizia del nostro publico e teneva in casa giuochi d'azzardo, in cui gli invitati perdevano sempre. Giunto improvvisamente il suo ricco Adone, fuggi seco lui la notte del 27 gennaio 1875, lasciando i Proci amaramente scornati.

— — — — —

Se 'l *magno* imperator de la saeta  
Da toro e da moscon s' à imascarà,  
E co l' à fato qualche fufigneta  
La pulizia no se n' à mai curà,

Perchè biastema tanto la gazeta  
E leva i pugni tuta la cità,  
Se una Venere in forma de civeta  
Da la crozzola a tempo s' à molà?

E vu altri, merloti spenaciai  
Sul magico tapeo dei so zogheti,  
Per cossa me steu là muti e brovai?<sup>1)</sup>

Su su, putei: s' anca la v' à burlà  
Co le so pantomime e co i so ocieti,  
No la v' à tolto el fior de l' onestà.

1) Mortificati.

## EL LASAGNON

(A UN CRÉDITOR)

Beati i oci che se ga incontrà!....  
Paron mio benedeto! Come vala?  
La me conta, la diga: cossa fala  
Che più no se la vede in società?  
E siora Menegheta come stala?  
I so fioleti? Quanti la ghe n' à?  
So fiastro Momi s' alo maridà?  
Montelo sempre quella so cavala?  
A proposito.... (bestia buzarona),  
Devo torghe un palcheto al principal;  
Xe mezoorno tanto che no 'l sona.  
Se ghe torno a man vode el me bastona.  
La reverisso in furia, sior Pasqual....  
I mii doveri co la so parona.  
— E facendo un profondo complimento,  
Co i so ciceri ciaceri sto sior  
El lassa a boca averta el creditor.

EL MOLINER POLTRON

Col muso sporco, l'ocio incagolà,  
I brazzi a picolon, le gambe storte,  
Quando 'l camina par che 'l vada a morte,  
E quando 'l parla, che ghe manca el fià.

No 'l se neta el scarpon infanganà,  
Mai no 'l saluda quando l'intra o sorte,  
No 'l se scompone de serar le porte  
Co 'l vien a tor la paga al mio mezà.

Ecolo là, co la pipeta in boca,  
Che 'l studia un'ora a quel che l' à da far;  
Ma l'aqua core e masenar ghe toca.

Gratandose la recia o 'l mapamondo,  
Prima che 'l se decida a laorar  
Zira tre volte una lumaga el mondo.



## LA PRIMAVERA

---

Che i me vegna a cantar la primavera,

Sti poeti bufoni e strambalai:

Mi so che stago mal pezo che mai;

Xe vinti giorni che no go più ciera.

Senza tor erbe nè medicinai,

Son più scolà d'un mocolo de cera;

Me par d'aver in testa una foghera,

Un centener de piombo nei stivai.

Tuto me dol: la schena, i fianchi, el peto,

E sordo come un vecio campaner

Da la poltrona me strassino al leto.

A ciaciarar, me stufo; se me meto

A lezer, no ghe trovo più piacer:

Assae se posso far qualche soneto.

EL SBRAGION.

— 49 —

Su che i te mazza, toco de frascona,  
Ghe ne vol tante a darne una candela?  
Diese volte ò sonà la campanela;  
Vustu, cagna da Dio, che me spolmona?

Dove xelo quel bieco de fanela  
Che m' à scaldà gersera la parona?  
La camisa de note dove xela?  
Movete, via, petazza buscarona!

Xe un' ora che te ciamo e che t' aspeto,  
Xe un' ora che me sbrego de criar:  
No sastu, sporca, che go mal de peto?  
Guai se me salta, sa, la mosca al naso....  
Ma xe Pasqua, e me devo confessar:  
Per questo ingioto, compatisso.... e tasò!

## LA MORETINA

---


La mia moreta la xe andata al bagno  
Fra l'alghe de la vasca militar,  
E za co le manine e 'l bel calcagno  
Da un ponto a l'altro la desmissia el mar.

Come un pesse levà fora dal stagno,  
Che a l'aria averta no pol più fiadar,  
Resto fiapo, isolà sora sto scagno,  
A fumar spagnoleti e sospirar.

Ma se cavo le fogie a sto bel fior,  
Se ponto el canocial a la mia stela,  
O se tasto l'oracolo d'Amor,

Sento che i dise che son qua per ela;  
E come mi la porto sempre in cuor,  
Culia son certo, la me ga in scarsela.

## LA VENERE DE STUCO




Ghe xe una tosa bionda e profilada  
Che da i caveli in zo fina 'l pein  
La ve par da le nuvole cascada:  
Una madona del pitor d'Urbìn.

Languidamente la ve dà un'ociada  
Che fa scombussolar el coresin:  
Se ghe va drio senza vedèr la strada  
Nè sentir le schiocae del veturin.

Co la verze 'l bochin la xe un portento,  
Anzi una maravegia de natura;  
Ma co la tase, oh Dio, son più contento.

Gesù mio benedeto, un'altra volta  
Famela senza lengua a diritura,  
O stropeghe le recie a chi l'ascolta!

## LA STRIGA GALANTE.



Sta zingana più negra del carbon,  
Più sutila d'un scheletro d'ombrela,  
Che mena a pascolar la so vedela  
O va sola de note a sdrondenon,  
Zogando a Ciara mata sul balcon,  
La ve se buta da sta banda o quela,  
La cuca e ride, la ve fa la bela  
Voltizando<sup>1)</sup> col naso a peveron.

Mi no ve digo ch'una cossa sola:  
Che son goloso, e no fénisso mai  
De curar fin a l'osso la brisiola;

Ma se i me dà una quagia tropo frola,  
Una renga, o un paneto da soldai,  
Vardo se ghe xe 'l can soto la tola.

1) Girando qua e là.

LA SPOSA

---

Go i mii ani e me voggio maridar.  
Ò catà fora una zentil putela;  
No l'è giusto una Venere modela,  
Ma la me piase per el so bel far.  
Notè e zorno me meto in sentinela,  
Per starghe drio trascurò ogni altro afar:  
Sta facenda la voggio destrigar  
Prima che la me rompa la scarsela.  
Ò perso in carne 'l quindese per cento;  
E se vardo el listin del zorno avanti,  
Sta cagna de passion tende a l'aumento.  
Vedo che a sto figher s'impica tanti:  
Sin che no provo no sarò contento....  
Anemo, su, Tonin, metete i guanti.

EL SCAPOLO

---

Mi no posso ingiotirla a nissun pato,  
Che in grazia de sto anelo benedeto  
Che no merita un soldo per carato  
E par oro de verga el più perfeto,  
L'omo più sodo, più svegià, più dreto,  
S'abia da perder come un celegato:<sup>1)</sup>  
L'è una cossa, per Dio, che fa despeto;  
Se la me toca a mi, devento mato.

Dove xela una femena de sesto  
Che staga in chiave, che no sia civeta,  
E parenti e mario no l'abia in cesto?

Ah, piutosto che un loto come questo,  
V'auguro, cari amici, una saeta....  
Omeni maridai, zonzeghe 'l resto.

1) Passerotto.

## EL SISTEMATICO

---

Dignitoso, pulito, compassà  
E delicato come una doneta,  
No voggio roba che no sia perfeta  
E conto quanti risi go magnà  
Vado in ufizio co la mia fiacheta;  
Fin l'ultimo minuto resto là;  
Come un specio xe lustro el mio meza,  
E senza pieghe xe la mia giacheta.  
Se fazzo el mio zireto a l'Aquedoto,  
Scometaria che un bovolò me ciapa;  
Se vado in biraria, me porto el gotò.  
Son prudente, pacifico, bigoto,  
Ma preferisso el fulmine del papa  
A una macia de seo sora el capoto.



EL SVENTADON

---

Quelo che d'una mosca fa un cavalo,  
E magna e beve e parla a strangolon,  
Che distinguer no sa bianco da zalo  
E vol ficarse in tute le quistion;

Quelo che salta da la frasca al palo,  
D'ogni storia facendo un zavagion,  
Ch'ora ve spenze, ora ve pesta un calo  
E ciga sempre e ga sempre rason:

Che cerca i soldi co 'l li ga in scarsela,  
E puza i guanti sora 'l fogoler,  
O va impizzar la pipa a la mastela,

Come xe vero 'l vin de sto bicier  
El lassarà un bel zorno la borela  
Fra 'l petene e 'l bruschin del so barbier.

## EL PETEGOLON


---

Vu che andè sempre atornò a squaquarar  
Quelo che un altro ve confida in recia,  
Vignì un momento quà, fiol d'una tecia,  
Che ve voi su sto ponto interogar.  
Cossa v' à rèso el vostro pampanar?<sup>1)</sup>  
Quel remenarve pezo d'una secia?  
D'esser sprezià più d'una scarpa vecia  
Che nissun zavatin pol repezzar.  
Mi, che nemigo son dei complimenti,  
Ve mando nel paese de colù  
Co tuti i vostri nobili parenti.  
E saveu cossa fazzo se per caso  
Incontro una carogna come vu?...  
Levandome 'l capel me stropo el naso.

1) Giarlare esagerando.

## EL FREDOLOSO

EL SPENDACION



Olà, Genaro, no ve vergognè  
De star fra i galantomeni a gratar  
Le buganze, a secarli col menar  
Le gambe zinzolando el canapè?  
Tuta la santa sera vu no fe  
Che missiarve, coverzerve e supiar:  
A l'infelice che ve sta a vardar,  
I grizzoli nei ossi ghe metè.  
Insina che ve dura quel tremazzo,  
No' steve più ficar tra le persone:  
Che no i ve toga per un pesse in giazzo;  
E co tocìè la man ne la pilela,<sup>1)</sup>  
Invece de pregar Cristi e Madone,  
Deve al santo che porta la graela!<sup>2)</sup>

1) La pila dell'acqua benedetta.

2) Graticola.

## EL SPARAGNIN

---

Prima de meter fora un carantan,  
Vardo ben de no romper la scarsela;  
Xe megio strenzer che lasciar la vela:  
Chi pol saver quel che sarà diman?

So levarghe la polvere al gaban,  
Giustar le braghe e repezzar l'ombrela;  
Resentarme, se ocore, la scuola,  
E contento me sfregolo le man.

Più dreto e sbiseghin d'una formiga,  
Curando a tempo sto afareto e quello,  
Me ciapo quatro schei senza fadiga;

E vivo quieto, col timor de Dio,  
Nel busetin che m'ha concesso el cielo:  
Se avè giudizio, fioi, vignime drio.

EL SPENDACION

Sparagnar! E per chi? Mo cara ela  
No la me vegna fora co ste fote:  
Ficarò nel pagion le banconote  
Per farghe tuto el dì la sentinela?

Sparagnar! Questa sì che la xe bela!  
Ve capita la schizza<sup>1)</sup> e bona note:  
Che le braghe sia nove o le sia rote,  
Vogia o no vogia za vignimo a quella.

E po: gala mai visto el funeral  
D'un milioner da tuti maledio?  
Gran festa in piazza e catafalco in domo;

Invece per chi mor a l'ospeal:  
Un zoto avanti e quatro babe drio:  
Xe più de quello che ghe basta a un omo.

1) La Morte.

## EL SCOLARO

---

Ciapa qua ciapa là, tuto el scomenza  
Pien de coragio e co la freve adosso;  
El tol fra i libri el volumon più grosso:  
El lo volta, el lo zira, el s'indormenza.  
El studia i verbi rosegando un osso,  
Analizzando el sbisega in credenza,  
E per meterse a far qualche sperienza  
El suga e sgionfa dei polastri el gosso.  
Primo esercizio co 'l vien via de scola  
Xe de dar scopeloti a i so fradei,  
E bater scherma co i pironi in tola.  
El se forbe la pena in tei cavei,  
Tuta la casa co l'ingioistro el bola,  
E trasforma i so temi in tanti osei.  
Se la mare ghe fa un'osservazion,  
Strenzendose le spale nol l'ascolta,  
Sinchè no la lo fica in un canton.  
Eco quello che gerimo una volta!

LA SCOLA VECIA

---

Rumegando 'l sermon, col fronte basso,  
Monta sul palco l'orator famoso;  
E fato un repeton cerimonioso,  
El resta duro che 'l ve par de sasso.

Dopo cinque minuti de riposo,  
L'alza la testa e 'l ve declama un passo  
Cambiando vose dal soprano al basso,  
Tirandose i cavei come un furioso.

El storze i oci più de l'orso bianco;  
E tuto sgionfo diventando e rosso,  
Un mato pugno el lassa andar sul banco.

E quando el s'inacorze d'esser stanco,  
La semadina el fa scolar nel gosso...  
La dota bava a gomitar più franco.

LA CASETA PERSEQUITADA<sup>1)</sup>

A UN PODESTÀ

Vedeu quela bicoca desgraziada  
Che a certi rospi fa vignir la freve,  
E à ciapà tante sbalotae de neve  
Che i me la ga deboto rovinada?  
In un colpo de man l'ò repezzada,  
L'ò fata piturar come se deve:  
La xe la perla de la so contrada,  
E posso dirve: „Podestà, specieve!“  
Ma dopo averme fato laorar  
Da fravo, d'architeto, da inzegner,  
Anca un soneto me voleu cavar?  
El soneto xe qua; ma per la coa,  
A dirla schieta, no m'ò dà pensier:  
Qualche censor ghe meterà la soa.

<sup>1)</sup> Una casipola sul viale dell'Acquedotto, che fece a lungo discorrere un giornale.



## LA BOCA FRESCA

---

Lo cognosseu quel chimico-droghier  
Che ve starave a tola tuto el zorno,  
Ch' in do e do quatro ve destriga un forno  
E che trinca molandose 'l braghier?  
Che ne la so fusina da spicier,  
In gran traversa e gran bareta a corno,  
Fra diese amici che bacana intorno  
El ve sa far da cogo e pastizzier?  
Che sa i boconi sgrafignar più grossi  
Da la pignata o da la cazzarola,  
E in do minuti no gavè che ossi?  
Portèghe mo a disnar una balena  
Ch' abia magari un altro Giona in gola:  
No la ghe bastarà gnanca da cena.

LA CASETA PERSEGUITADA

EL MATERIALON

---

Vado cò le mie femene in Arquà  
Per visitar la casa de quel tal  
Canonico bislaco, original,  
Che Laura e sempre Laura n' à cantà.  
No trovo che un scritorio e un caramal,  
La so poltrona e un gato imbalsemà;  
E dopo un' ora che me son secà,  
Vegno via, posso dir, come un stival.  
I me conta che i omeni più fini  
Varda quele cagnere co respeto  
E a peso d' oro le voria comprà;  
Mi digo che i xe mati da ligar;  
Corpo de bio, ma se i le porta in gheto,  
Chi diavolo ghe dà cinque fiorini?

## L'OMO DE MISTIER

---

Quatro versi butai come vien vien,  
Senza imbroggi de note e de coment: l  
Eco el reciamò, la m'intenda ben, l  
Per trar a mea un mondo de clienti. l

Chi leze un libro come se convien,  
Vol mastegar la papa col i so denti; l  
No vol perder un'onza del teren, l  
No vol trovar intopi nè acidenti. l

A quei poeti se ghe dà l'aloro  
Che sa mostrarghe al popolo zucon  
Traverso a un mar de sienza el fondo d'oro.

Il più svelti, i più pratici, i più astuti  
Schicara<sup>1)</sup> in sta maniera, e i ga rason:  
Xe i aseni che compra più de tuti.

1) Imbrattano fogli.

## L' IPOCONDRIACO

---

Co me sento in desordene el figà,  
E ne la gnuca i sintomi del splin,  
Me devo calumar soto 'l piumin,  
E fin che la me passa resto là;

Se no, tuto va in oca el mio morbin,  
Perdo le gambe, la parola e 'l fià:  
Pien de soldi, me credo un desperà;  
Nobile, me retegno un zavatin.

Da sti amici tacai co la spuazza  
Scampo, e di e note studio la maniera  
De far un salto zo dal campanil.

Se per disperazion vado a la cazza,  
Speto 'l tordo e 'l fasan co l'ocio in tera;  
Davanti al lievro meto zo el fusil.

EL BONTEMPO

Cossa xe? Un'altra letera?... Confesso  
Che no me l'aspetava... Cossa fazzo?  
Mio fradelo no scrive tanto spesso,  
E da un mese el mio vecio à perso un braccio.

Semo de carnaval, e go promesso  
De vestirme stasera da pagiazzo:  
Se mio pare sta meglio opur istesso,  
No gh'è rason de perder el solazzo.

Se invece, povareto, tuto in t'un  
El fusse andà, so fio cossa ghe falo?  
El dolor no ressussita nissun.

La verzo o no la verzo?... Tanto fa,  
Metemola in scarsela e andemo al balo:  
La lezarò doman pena svegià.

## L'AVOCATO FILOSOFO

---

Lasso el teatro de la mia carriera;  
Vendemelo sto tibio<sup>1)</sup> a chi lo vol:  
Piu libero sarò d'un pagnarol,<sup>2)</sup>  
Felicità cercando in altra sfera.  
Voi dedicarme a l'ozio campagnol,  
Sgionfarme d'aria da mattina a sera;  
Dopo disnar voi stravacarme in tera  
Col muso a l'erba e 'l mapamondo al sol.  
Sì, voi goder la vita pastoral  
Fra le patate, i cavoli, i formenti,  
Senza brusor de titoli e d'impieghi.  
Sarà per mi quei loghi el tribunal,  
Le piegore e le cavre i mii clienti,  
E le bestie da soma i mii colleghi!

1) Studiolo. -- 2) Passero.

## EL MISTISMO

---

Nissun omo de garbo e de cervelo  
Me podaria de certo contrastar  
Che no se dà incantesimo più belo  
De quel ch' invida i morti a bagolar.  
Che fa vignir svolando Farfarelo  
Quatro ciacole in turco a baratar,  
E su la capa mistica del cielo  
Fa i numeri del loto sfiamizar.

Me saltè su che questa no xe senza....  
Caspita! La xe andata apena a scola  
E volè che la beca l' eminenza?  
Xela o no xela fia de Pantalòn?...  
Basta per diventar 'na brava fiola:  
Xe so pare che paga la lizion!

EL MEDEGO DA BUGANZE

---

Questo xè quel famoso zarlatan  
Che vanta un colpo d'ocio che no fala,  
Metendoghe le pape a un membro san,  
Mandandó a l'ospeal chi ga la bala.  
Che ve core su e zo per ogni scala  
Benchè al so leto no lo voglia un can,  
O stravacà nel carozzon de gala  
Passa in trionfo col so libro in man.  
Che se fa co i goleti rimarcàr,  
Col ton da Dulcamara, co l'imbrogio,  
E sgionfando i zornai se fa lustrar.  
Che no à mai tempo de vardar un sfogio,  
Ma sempre ghe ne avanza per babar,  
E per slongarve i pesi del relologio.



LA TERAPIA DEL ZORNO

---

Sia benedeta la moderna scola  
De medicina, che in qualunque mal  
La rispeta la vena a l'anemal  
E Cipro e vovi la ghe porta in tola.  
Se tuto in t'un ghe manca la parola,  
E capita su el prete col feral  
Per schiarirve la strada sepolcral,  
La xe pronta a rostirve la brisiola.  
Prodiga più dei Greci e dei Romani  
Che ve meteva in boca el biscotin,<sup>1)</sup>  
La ve sgionfa de tordi e de fasani.  
E rivando a l'Inferno a panza piena,  
Se core al so destin tuti contenti:  
Barba Pluton pol sparagnar la cena.

1) Una moneta per Caronte, e un pezzetto di focaccia per il Cerbero.

ONRI FALOPONI LA  
EL MEDICO DA SUGANZE

Basta che tolè in man una gazeta  
Republicana o clerical che sia,  
Per veder come in qualche specieria  
Se vende a peso d'oro l'aqua schieta.  
Qua xe un decoto, là una piroleta  
Per le móroide o per la nevralgia:  
De siropi gavè una litania  
Che a Venere ghe manda una saeta.  
Pastrocì de potassa e de carbon,  
E l'elisir d'un mago american  
Che ve straponze i busi del polmon.  
E un flagelo d'empiriche resie  
Predicæ da Mercurio zarlatan  
Che *roste*<sup>1)</sup> il mondo a forza de *busie*.<sup>2)</sup>

1) Inbroglià. — 2) Ricci ch'estono dalla pialla.

EL VERO SISTEMA

Se la Morte spassiza in farmacia,  
Se i medici ve mazza a bon mèrcà,  
E i ve squarta, e i ve fa l'anatomia  
Per dirve ciaro come sè crepà;

I quattro schei<sup>1)</sup> che ve gavè ingrumà,  
Spüar fora dovè per malatia:  
No saria meglio far la carità,  
O *intavolarli* al zioigo o a l'osteria?

Fè come mi che no voi tor mai gnente;  
Che a sessant'ani cavo un do de peto;  
So forte in gamba e no me bala un dente.

Ma che consulti, che medicinai!  
Un lavativo d'aqua fresca, e leto:  
No xeli tuti soldi sparagnai?

1) Centesimi.

## LA SONAMBOLA

---

Quela celebre fada bolognese  
Che sera i oci per veder più ciaro,  
Mete in sacco San Piero, San Genaro  
E tute le reliquie de le ciese.

La ve fa più miracoli in un mese  
Che in un secolo i bagni de Recuaro,  
E se pol dir che 'l so talento raro  
Assae più val d'un boridon<sup>1)</sup> francese.

Lezer la sa nei libri del futuro  
Sta gran Sibila, e franca l'indovina  
De l'anema i secreti e dei buei.

Qualunque altar la ve scoverze a scuro:  
Basta mandarghe in una cartolina  
Cinque grame lirete e do cavei.

Chi no gavesse un pel sora la zuca  
Pol spedir soto fassa la peruca;  
Solo v'averto, per el vostro ben,  
Che senza i bori l'estasi no vien.

1) Parabolano.

IN MORTE D'UNA MASSERA

---

Vitima d'una fiera indigestion,  
Stira i calcagni, oimè, la mia Tonina,  
L'anzolo che vigniva la matina  
A desmissiarme e verzerme 'l balcon.

Quela che con un braccio da Sanson  
Revoltava la mescola in cusina,  
E co la man de grasso e de farina  
Ghe dava quatro ponti al patelon.

In st' Arabia Petrea cossa me resta?  
Come da i venti salvarò 'l capelo?  
Dove, dove, gran Dio, bater la testa?

Me raccomando a Vu, paron del cielo;  
Perchè dopo una serva come questa,  
Mare natura ga serà el cancelo.

LA SBORGNA DIPLOMATICA

Ab che fragia, sior Luca! S' à balà  
Fin dopo mezanote, e nel bufè,  
Branca chi branca, tuti s' à sludrà<sup>1)</sup>  
Co bibite, pastizzi e fricassè.

Chi s' à macià le braghe e chi el gilè,  
Piatì e bicieri in tochi s' à mandà;  
S' à rebaltà careghe e canapè,  
E per tera più d' un s' à remenà.

Peraltro, col mio modo de pensar,  
Go in odio sti bordei, ste confusion;  
E, dove posso, me la so cavar;

Ma co certe zelenze, come fala?  
Per conservar sto fià de posizion,  
Cossa vorla? Anca mi ciapo la bala.

1) Rimpinzati.

## LA SPISIMA

---

Quel San Bortolo tanto celebrà  
Che se amira nel domo de Milan,  
Quel da la pele scortegada in man,  
Me par assae più in carne e ben tressà  
De sto classico avanzo pompejan  
Che tontonando <sup>1)</sup> bagola qua e là,  
Ingrizzolio, col capelin fracà,  
E i zampini insacai nel palandran.  
Tremando el parla in chiave de violin,  
Tirando 'l colo come fa el polame  
Che becola per tera el sarasin.

A sto naso filà, pien de catrame,  
A sto lemo, <sup>2)</sup> a sta ciera d'Ugolin,  
Ghe perde l'apetito anca la Fame.

1) Tentennando. — 2) Lagno continuato.

EL SENSER D'AFITANZE

---

Ve par gnente sta vita de levrier?  
Sto semenar busie più che parole?  
Spesso de bando conumar le soie  
E fruar tuti i feri del mistier?  
Spassizar tra i garofoli e le viole  
Per usmar <sup>1)</sup> ogni buso del quartier;  
E passar da la caneva <sup>2)</sup> al graner  
Fra le babe che petena la prole?  
Romperse i corni soto i luminai? <sup>3)</sup>  
Fra le bote sporcars e fra le pile,  
Impenirse de polvere el gaban?  
Là, come cani, i pulesi danai  
Scorlarse in zito, e sofegar la bile  
Spetando el ragno co la felpa in man?

1) Il fiutare dei cani bracchi.

2) Cantina. — 3) Abbaini.



EL CODICE DELLO SPIRITO EL PARON

---

Ve posso assicurar che a casa mia  
Tuti xe zero e che so mi el paron:  
Per questo vado solo in pescaria  
E torno su col granzo e col melon.

Corer spesso me toca a l'ostaria  
Co la botiglia soto el veladon;  
E quando 'l pozzo segna carestia  
Me vedè co la fiasca al fontanon.

Nissun altro che mi vanta el diritto  
De firmar conti, letere, contratti,  
E pagar el testatego e l'afito:


E quando mia mugier co la massera  
Se sgrafa i oci e manda in aria li piati,  
So qua mi.... per le spese de la guera.

EL CODICE D'UN OMO DE SPIRITO

---

Ridendo sempre e no badando a gnente,  
Remenarse qua e là matina e sera;  
Aver de fumo piena la caldiera  
E fra i gonzi passar per brava zente;  
Divertirse e fragiar alegramente,  
El manego butar drio la manera,  
Slanzarse de galopo e de cariera  
Nel circolo più sporco e spuzzolente.  
Lussi, done, cavai, teatri e bali;  
Stravacarse e dormir tranquilamente  
Sora un leto de conti e de cambiali.  
Su i gran bigliardi vadagnarse i cali;  
Bater la carta e sconder bravamente  
L'ongia del ladro soto i guanti zali.

## L'ANTIQUARIO



Trasporteme a l'Acropoli d'Atene,  
Fra i tesori de Samo e de Corinto;  
Fra le mumie d'Arnolfo e Carlo Quinto,  
Fra bronzi e marmi, fra corazze e antene.

Lasseme furegar<sup>1)</sup> nel labirinto  
Dei porteghi de Stabia e Mitilene;  
E tra vasi, mosaici e pergamene  
Solevar i nizioi d'Argo e Perintò.<sup>2)</sup>

Scaturir<sup>3)</sup> aquedoti e mausolei,  
La polvere spazzar d'ogni antigagia  
E ingrumar<sup>4)</sup> le zavate dei Caldei.

Lasseme là, pacifico eremita,  
Lustrar del vecio mondo la medaglia;  
Nei morti regni semenar la vita!

1) Rovistare.

2) Città della Tracia, rinomatissima pel suo anfiteatro scavato nel macigno

3) Scoprire. — 4) Raccogliere.

EL PITOR

---

Corpo de bio, no so più cossa far  
Per finir el ritrato de sto morto;  
I parenti vien qua per bel diporto;<sup>1)</sup>  
Nissun sa guente e tuti vol parlar.

Dopo tre mesi che i me fa suar,  
Chi lo voria più rosso e chi più smorto;  
Chi el naso assae più dreto e chi più storto:  
Toca, ritoca e torna a spegazzar.

Ma la classica xe che sti batoci  
Se mete fra de lori a contrastar,  
Perfina, cape, sul color dei oci;

Chi lo vol blù, chi negro e del più forte...  
Mo via, che no i se staga a riscaldar:  
Ghe li farò, magari, uno per sorte.

1) Per ozio, per divertimento.


## EL MECANICO

---

No la ghe bada, sala, a ste marmote  
Che vol far i bigné<sup>1)</sup> senza farina:  
L'arte e la poesia no xe dotrina;  
Queste, la scusa el termine, xe fote.  
Ciamarò sienza quella che camina,  
Che slonga el zorno e fa sparir la note,  
Che sbusa i monti, fa saltar le grote,  
E l'Irlanda co un fil sposa a la China.  
Che ghe sequestra i fulmini al Tonante,  
Che ne la luna sa ficar el naso,  
E l'ocio ne le vie de l'Infinito.  
Che Zeusi! Che Prassitele! Che Dante!  
Che Olimpo! Che Liconà! Che Parnaso!  
Riude, stantufi e manoele: ò dito.

1) Frittelle.

## EL PRETE E 'L ZORNALISTA



Bepo: se conossemo da putei,  
Co se ziogava ne la corte istessa;  
Nel trentanove mi go dito messa,  
E da quel tempo ti me dà del lei.  
Ma semo sempre stai più che fradei;  
E come no ti vol che me rincressa  
A veder nei to scriti compromessa  
La ciesa e i servi de l'altare Dei?  
Fin che ti bati i vescovi, pazienza;  
Siben che.... a vidimarghe le bolete  
L'è afar de la Divina Provvidenza;  
Ma intrar nel sacro tempio co violenza,  
E profanar la cotola del prete,  
Bepo.... no go bevù.... xela cossienza?

EL ZORNALISTA E 'L PRETE

---

So Ludro, e me ne vanto! Oh questa è bela!  
Varè che adesso no sarò paron  
De stuarghe a San Piero la candela  
O sonarghe a Bertoldo el campanon!  
Mi no go mai tocà la religion,  
Che, a dirla schieta, no la xe più quela.  
I preti? Mo che i vada a tombolon....  
Abate: fazzo un'ecezion per ela.  
Comandeli? So qua: che i vegna avanti.  
S'anca no i paga subito, no cade:  
A mi la cura de muar i santi.  
Se no, destiro zo: chi toca toca.  
Ogio per questo a dir mea culpa? Made: <sup>1)</sup>  
No forbo mai la pena co la boca.

1) Mainò.

EL CODON

---

Mi so che prima del quarantaoto  
Se stava in pase e se viveva ben:  
Co pochi soldi se beveva el goto,  
Co do zvanzeghe al zorno geri pien.

Adesso invece andemo sempre soto,  
Le cedole ne va come le vien:  
Continuando ogni poco de sto troto,  
Dio no lo voglia, magnaremo fien.

E tuto causa quei che vive a scroco,  
Causa sti desperai de framassoni  
Che ciga: *Luse al popolo panduro!*

Mi son vecio e i me buzara de poco;  
Ma so da l'esperienza che i caponi,  
Per ingrassarli, se li tien a scuro.



L' O M O

*Daiovich -  
frequentato del Caffè dei Dindi*

Cànteme, o Diva, el doto paladin  
Sbaragiaor dei pregiudizij umani;  
El severo barbon da capucin  
E la zazzara a bovoli spartani.

Cànteme la casaca da un fiorin,  
Le braghesse da vinti carantani;  
I scarpini e 'l baston da pelegrin  
Che pesta i sassi e mete in guardia i cani.

Càntelo quando, a mezanote, in strada,  
El fa lunarj sora qualche stela,  
O 'l mastega el problema e la siarada.

Càntelo in mar, co 'l nua come un bisato,  
Col capelon de pagia e co l'ombrela.  
Càntelo, o Musa, concentrà sul piato,

Co 'l svoda una terina de minestra  
Cedendo el manzo e tuto el resto al gato.

Càntelo infin co 'l branca la parola  
Per stroparghe la boca a un celegato,<sup>1)</sup>

O sora i *dindi* com' aquila el vola!<sup>2)</sup>

1) Passerotto. — 2) Al caffè dei Dindi.

I POLITICANTI

A vederli, a sentirli radegar,<sup>1)</sup>  
Andando in aria, sti politicanti,  
Chi no li crede Orazj e Sagripanti  
Che per la gloria se faria squartar?  
Varè co quanto inzegno i sa formar  
I batagioni per cazzarli avanti;  
Con che giudizio i sa condurve i fanti  
Soto i canoni o farli ritirar!  
Ministri e sacerdoti de la fufa,<sup>2)</sup>  
Al fogoler no i se avvicina mai  
Che per vardar se bogie la pignata.  
Quando i governi vol catar barufa,  
Che i meta su un milion de sti soldai:  
Ziogo la testa che la pase è fata.

1) Altercare. — 2) Paura.

LA BIRBA

Soto el tabaro da persona onesta  
El protòtipo son dei scanaori,  
Metendo sul rampin poveri e siori,  
No puzando el cortel gnanca la festa.

So dar la mazzocada su la testa  
A la malga<sup>1)</sup> dei mii benefatori,  
E dopo aver buscà titoli e onori  
Fazzo la rioda e levò su la cresta.

Mi, dopo 'l terzo.... o quarto falimento,  
Fumo el zigaro in Borsa come prima,  
Gran Cancelier del tredese per cento:

E aciò che 'l mondo sempre più me stima,  
Ingrumo e scondo el zucaro e 'l formento  
Dei magazenì averti a son de lima.

1) Mandra.

## LA CORSA DEI BARBARI

---

Tuti quanti me dise: „Varè là,  
Vu che andè in cerca d'un genial sogeto:  
Varè là che magnifico quadreto  
Pien de grazia, de brio, de novità!“

E i me mena davanti a un vaporeto <sup>1)</sup>  
Che vien fischiando alegramente in qua,  
Stracarego de zente ch'al mercà  
Vien col panier, la sporta e 'l cesteleto.

La machina e 'l timon se move ancora,  
Che i salta come rospi su la riva  
E in quatro slanzi el molo i se divora;

Ghe bagia i cani e spasemai li schiva;  
D'ogni banda le guardie sbalza fora  
Drio sta marmagia ch'à ciapà la briva;

E là, sul campo de la Piazza Magna  
Come un stormo de corvi i se sparpagna;  
In mancanza de pele de pantera,  
Su le giachete i se stravaca in tera;  
E ronchizando co la lengua fora  
La fergnocola <sup>2)</sup> i speta de l'Aurora.

1) Da Capodistria. — 2) Buffetto.

## LE POMPE FUNEBRI

---

Nè Tito, nè Severo, nè Trajan  
Tornava indrio da i campi de la gloria  
Con più sfarzosi emblemi e più baldoria  
Fra la calca del popolo roman.

De tanta pompa no ghe xe memoria  
Nei funerali de l'eroe trojan:  
No trovè tanto lusso zarlatan  
Fra tute l'orgie de l'antica storia.

Spetacolo de cari e de cavai,  
Peruche, fornimenti, penacioni,  
Tricorni e fiori, mocoli e ferai;

Musiche turche e son de campanoni,  
E una gran coa che no fenisse mai  
De quei ch' in vita v' à secà i....

IN PIAZZA S. MARCO

Siorsi... la piazza è bela... po mincioni!  
Solo, bisognarave sbarazzar  
Sto ciapo de colombi sporcacioni  
Che se vede a ogni passo bagolar.  
Sta Vecia Carobera<sup>1)</sup> dei mii noni,  
La vorave de pianta reformar,  
E a la barba de certi paruconi,  
Da un cao a l'altro tuta sbianchizar.  
Adatando a la sagoma<sup>2)</sup> i colori,  
Passaria la Basilica per nova,  
E più bon pararave anca el relologio.  
Metèghe un par de braghe a quei do mori,<sup>3)</sup>  
E dapertuto dove le se trova  
Gratè le statue e deghe suso l'ogio!<sup>4)</sup>

1) Le Vecchie Procuratie. — 2) Forma.

3) Vedi la chiesa di S. Pietro a Roma.

4) Vedi l'edificio della Borsa a Trieste.

## AL PALAZZO DUCAL

---

Chi diavolo avarà d' esaminar  
Tuti sti dōsi, sti guerieri e santi?  
Cossa voleu che possa interessar  
Ste buzare a nualtri negozianti?  
Se podarave tor, come fa tanti,  
Un ciceron che sapia sbatolar:  
Lu ne la conta, e nu passemo avanti  
Insina che vien l' ora de disnar.

Ne mòstrelo el famoso mapamondo? ...<sup>1)</sup>  
No merita fermarse a strolegar:  
Me basta vèder se l'è quadro o tondo.  
Semo a le *quattro Porte*?<sup>2)</sup> Ca de dia!  
Mi che no voi lassarme infenociar  
Vardo se le xe *quattro* e tiro via.

1) Di Fra Mauro.

2) La sala dalle Quattro Porte, con dipinti di Tiziano, del Caliari, ecc.

EL GABINETO LETERARIO

---

O nobile academia citadina  
De simie e d'elefanti amaestrai,  
De bovoli<sup>1)</sup> che parla e che camina,  
E d'ostreghe che leze senza ociai;  
Parussole<sup>2)</sup> e dindiotti incoconai  
De semola che passa per farina,  
Canarini, gardei e papagai  
Che becola el pignol d'ogni dotrina:  
Dame un buseto ne la to vetrina  
Fra quel mucio de sepe e caramai  
Che vive ne l'ingioistro de la China;  
E se tuti quei posti xe impegnai,  
Lasseme far sto vovo de galina  
Fra i colombi salvadeghi e i cocai.

1) Lumache. — 2) Cingallegre.



## EL NOSTRO ELEMENTO

---

Come gür<sup>1)</sup> l'inzegno in sta cità?  
Fra le bale de canevò e coton,  
Fra le doghe, el petrolgio e fra 'l carbon,  
La passolina,<sup>2)</sup> i fighi e 'l bacalà?

Quando vedemo Socrate e Platon  
Tegnir la Prima Nota in un meza?<sup>3)</sup>  
Colombo in aria d'armador spiantà  
E giudice dei scarti Salomon?

Quando vedemo in Borsa Galileo  
Sul moto specular de le valute,  
E sul corso dei cambi Tolomeo?

Diogene fra i barili de le aciughe,  
Pitagora mercante de Calcute,<sup>4)</sup>  
E Ciceron senser de tartarughe?

1) Affinare. — 2) Uva passa.

3) Il primo registro in uno scrittoio.

4) Pelli di Calcutta.

GIUDA


---

Eco Scariòt che sogna el tradimento  
E se desmissia co la borsa in man;  
Ma Satana lo guanta in quel momento  
Cigando: So qua mi, razza de can.

Giuda ghe sbrissa via pien de spavento,  
Fra le zate lassandoghe 'l pastran,  
E cento cale traversando e cento  
El se fica ne l'orto del piovan.

Meterse 'l lazzo sora un gran figher  
E cascar zoso come un pero gnoco,  
Xe la storia d'un lampo, d'un pensier;  
Ma 'l diavolo più forca e più lizier,  
Rompe co i denti a la cravata el fioco  
E ghe mete un cordon da cavalier.

## ADIO A LE MUSE



El più grosso maron che i Numi à fato  
Xe sta quello de meterme a sto mondo  
Con un teston più d'un'anguria tondo,  
Con un ramo de savio e do de mato.

Per questo in Elicona me sprofondo,  
Me rampego in Parnaso co fa un gato,  
E per aver sbozzà qualche ritrato  
Me credo un genio che no gh'è 'l secondo.

Ma l'aseno che fa da cavriol  
Tombola e peta el sgneco nel leame;  
E a mi le culatae, cazza, me pol.

Sognar la gloria e po crear de fame,  
Xe un gusto che lo lasso a chi lo vol:  
Torna più conto assae conzar curame.

## L' APOTEOSI

---

Numi, se un zorno podarò montar  
Per le scale de sea<sup>1)</sup> nel paradiso,  
E se fra i cori del beato Eliso  
La falilela podarò cantar;

Se i pani d'oro podarò gustar,  
E aver la grazia de vardarve in viso,  
Da la rosa de Gerico al narciso  
Come farfala podarò svolar;

Tuto 'l di no farò che matizar  
Fra i nuvoli scrivendo i mii verseti,  
Che intorno a i fiori ve farò stampar.

No domando la gloria o la pension  
Che gode in cielo i spiriti perfeti:  
El titolo me basta de bufon.

1) Seta.



## L' APOPEUSI

Nam, si ea corp. pulchro muner  
Per te, cum de me, nel per alios  
Ede, uti e cor, uti in an. L'as  
L'edifica pulchro muner:

Se i fan, d'oro, podaro gudo,  
E' d'oro la rosa de yardave in che  
De la rosa de tierico al narciso  
L'omo fardola podaro svelat:

Tuto, V di no fan che matiza  
Fet i quoli ser vando i mi versita  
Che amoro a E' d'oro ve l'oro d'oro:

No domando la gloria o la penson  
Che gudo in cielo, i spiriti petenti  
El gudo mi haet, le babo.

## INDICE

---

### DEDICA.

### PREFAZIONE.

A mio compare Anzolin . . . . .	pag. 5
Chi xe l'autor? . . . . .	7
La mia contrada. (1873) . . . . .	13
In morte d'un gato . . . . .	16
El socio moderno . . . . .	17
Angelica e Medoro . . . . .	18
El misantropo . . . . .	21
El curioso . . . . .	24
El ciaciaron . . . . .	25
Le squinzie . . . . .	27
La marantega . . . . .	29
El zerbinoto . . . . .	31
A un comitato eletoral . . . . .	33
La cremazion . . . . .	35
El sospiro de Tomaso Canela . . . . .	38

### PREFAZIONE AI SONETTI.

La mia morosa . . . . .	45
L'antitesi . . . . .	46
Apolo in campagna . . . . .	47
L'incognita . . . . .	48
La versomania . . . . .	49
Per celebre artista . . . . .	50
A un esimio capocomico . . . . .	51
El ciasson . . . . .	52
El teatro giazzera . . . . .	53

La mima selerata . . . . .	pag. 45
El lasagnon . . . . .	55
El moliner poltron . . . . .	56
La primavera . . . . .	57
El sbragion . . . . .	58
La moretina . . . . .	59
La Venere de stucco . . . . .	60
La striga galante . . . . .	61
El sposo . . . . .	62
El scapolo . . . . .	63
El sistematico . . . . .	64
El sventadon . . . . .	65
El petegolon . . . . .	66
El fredoloso . . . . .	67
El sparagnin . . . . .	68
El spendacion . . . . .	69
El scolaro . . . . .	70
La scola vecia . . . . .	71
La caseta perseguitada . . . . .	72
La boca fresca . . . . .	73
El materialon . . . . .	74
L'omo de mistier . . . . .	75
L'ipocondriaco . . . . .	76
El bontempon . . . . .	77
L'avocato filosofo . . . . .	78
Spiritismo . . . . .	79
El medego da buganze . . . . .	80
La terapia del zorno . . . . .	81
I faloponi . . . . .	82
El vero sistema . . . . .	83
La sonambola . . . . .	84
In morte d'una massera . . . . .	85
La sbergna diplomatica . . . . .	86
La spisima . . . . .	87
El senser d'afitanze . . . . .	88
El paron . . . . .	89
El codice d'un omo de spirito . . . . .	90
L'antiquario . . . . .	91
El pitor . . . . .	92
El mecanico . . . . .	93



El prete e 'l zornalista . . . . .	pag. 94
El zornalista e 'l prete . . . . .	" 95
El codon . . . . .	" 96
L'Omo . . . . .	" 97
I politicanti . . . . .	" 98
La birba . . . . .	" 99
La corsa dei barbari . . . . .	" 100
Le pompe funebri . . . . .	" 101
In piazza S. Marco . . . . .	" 102
El palazzo ducal . . . . .	" 103
El gabineto letarario . . . . .	" 104
El nostro elemento . . . . .	" 105
Giuda . . . . .	" 106
Adio a le Muse . . . . .	" 117
L'apoteosi . . . . .	" 108



48318

## CORREZIONI E VARIANTI

- Pag. 15 verso 16 *no vien*  
" 14 " 16 *lagreme*  
" 28 " 19 *El vadagno d'un mese del mario,  
Vignì qua tute a farve ciare al lume  
De sto fior de Lugrezie pampanone:  
E 'l nome vostro sonerà immortal  
Ne l'augusta Sorzera Comunal.*  
" 38 " 8 *Ch'al spessegar d'un cotolin che scola,*  
" 46 " 6 *M' à*  
" 81 " 5 *ve manca*



48218

